

Pamahayag 1: Dili angay nga mangutana kabahin sa doktrina, mga pagtulon-an, mga palisiya, ug kasaysayan sa Simbahan.

Isip usa ka grupo, hisgoti ang katukma sa pamahayag 1. Basaha ang Joseph Smith—Kasaysayan 1:10–13, ug hisgoti kon sa unsang paagi ang pagpangutana nakausab sa kinabuhi ni Joseph Smith. Dayon basaha ang mosunod nga mga pamahayag sa mga lider sa Simbahan:



Ang pagpangutana mao ang sinugdanan sa pagpamatuod. Ang uban tingali mobati og kaulaw o nga dili takos tungod kay aduna silay seryoso nga mga pangutana mahitungod sa ebanghelyo, apan dili sila kinahanglan nga mobati sa ingon. Ang pagpangutana dili timailhan sa kahuyang; kini ang mag-una sa paglambo.

Ang Dios nagsugo kanato nga magtinguha sa mga tubag sa atong mga pangutana ug naghangyo lamang nga magtinguha kita nga “kinasingkasing, uban sa tinuod nga katuyoan, nga may hugot nga pagtuo kang Kristo” [Moroni 10:4]. Kon mobuhat kita niini, ang kamatuoran sa tanang butang mapakita ngari kanato “pinaagi sa gahom sa Espiritu Santo” [Moroni 10:5].

Ayaw kahadlok; pangutana. Pagmahimong kuryoso, apan ayaw pagduhaduha! Kanunay nga maghupot og maayo sa hugot nga pagtuo ug sa kahayag nga inyo nang nadawat. (“President Dieter F. Uchtdorf: The Reflection in the Water,” *Church News*, Nob. 1, 2009, thechurchnews.com)



Ipaabot ang inyong mga pangutana ngadto sa Ginoo ug sa ubang katuohan nga mga kapanguhaan. Magtuon dala ang tinguha nga *motuo* kay sa maglaom nga imong makit-an ang sipyat sa kinabuhi sa propeta o sayop sa mga kasulatan. Hunonga ang pagdugang sa inyong mga pagduhaduha pinaagi sa paghisgot niini ngadto sa ubang mga maduhaduhaon. Tugoti ang Ginoo nga mogiya kaninyo sa inyong panaw sa espirituhanong panimpalad. (Russell M. Nelson, “Si Kristo Nabanhaw: Ang Hugot nga Pagtuo diha Kaniya Makabalhin og mga Bukid,” *Liahona*, Mayo 2021, 103)

Adunay nag-una nga mga pangutana ug adunay ikaduha nga mga pangutana. Tubaga og una ang nag-una nga mga pangutana. Dili tanang pangutana managsama ug dili tanang kamatuoran managsama. Ang nag-una nga mga pangutana mao ang labing importante. Ang tanan nga uban mas menos. Adunay pipila lamang ka nag-una nga pangutana. Akong hisgotan ang upat niini.

1. Aduna bay usa ka Dios kinsa mao ang atong Amahan?
2. Si Jesukristo ba mao ang Anak sa Dios, ang Manluluwas sa kalibotan?
3. Si Joseph Smith usa ba ka propeta?
4. Ang Simbahan ni Jesukristo sa mga Santos sa Ulahing mga Adlaw mao ba ang gingharian sa Dios dinhi sa yuta?

Sa sukwahi, ang ikaduha nga mga pangutana walay kataposan. . . .

Kon tubagon ninyo ang nag-unang mga pangutana, ang ikaduhang mga pangutana matubag usab, o dili na kaayo kini importante ug kamo makahisgot sa mga butang nga inyong nasabtan ug sa mga butang nga wala ninyo masabti ug sa mga butang nga inyong giuyonan ug sa mga butang nga wala ninyo mauyoni nga dili mobiya sa hugot nga pagtuo. (Lawrence E. Corbridge, “Stand Forever” [debosyonal sa Brigham Young University, Ene. 22, 2019], speeches.byu.edu)

Hisgoti ang mosunod nga mga pangutana:

- Unsa ang bation sa Ginoo mahitungod sa atong pagpangutana? Unsa ang atong madawat gikan sa Ginoo kon mangutana kita Kaniya sa atong mga pangutana?
- Unsa ang kalainan tali sa pagpangutana nga may hugot nga pagtuo ug sa pagpangutana nga may pagduhaduha? (Aron mas mahisgotan pa og maayo, mahimo ninyong basahon ang Alma 22:4–12 isip usa ka ehemplo sa pagpangutana nga may hugot nga pagtuo ug ang Alma 11:21–22, 26–35 isip usa ka ehemplo sa pagpangutana nga may pagduhaduha.)
- Ngano kahang mas importante nga ilhon ang kalainan tali sa nag-una ug ikaduha nga mga pangutana? Unsa kaha ang mahitabo kon ibaliwala nato ang nag-una nga mga pangutana ug motutok lamang sa ikaduha nga mga pangutana?
- Sa unsa nga mga paagi nga ang pagpaabot sa inyong mga pangutana ngadto sa Ginoo ug ngadto sa ubang matinud-anon nga mga indibidwal ug sa makapalig-on nga mga tinubdan miugmad og pagkat-on ug paglambo sa inyong kinabuhi?

Base sa unsay inyong nakat-onan atol niini nga panaghisgotan, irekord ang usa ka giusab nga bersiyon sa pamahayag 1. Pangandam sa pagpakigbahin sa inyong giusab nga pamahayag ug sa unsay inyong nakat-onan ngadto sa inyong klase.